

原
人
論

檢
閱
済
印

225
421

016221-000-9

特52-353

原人論

宗密/述

M36.10

ABD-0070



原人論并序

終南山草堂寺圭峰蘭若沙門宗密述

萬靈蠢蠢者有其本。萬物芸芸各歸其根。未有無根本而有枝末者。也。况三才之中。唯人最靈。而豈無本源乎。且知人者。智。自知者。明。今我稟得人身。而不自知所從來。曷能知他世所趣乎。曷能知天下古今之人事乎。故數十年中學。無常師。博考內外。以原自身原之。不已。果得其本。然今習儒道者。祇知近則乃祖。乃父。傳體相續。受得此身。遠則混沌一氣。剖為陰陽之二。三生天地人三。三生萬物。萬物與人。皆氣為本。習佛法者。但云近則前生造業。隨業受報。得此人。身。遠則業又從惑展轉。乃至阿賴耶識。為身根本。皆謂已窮其理。而

實未也然孔老釋迦皆是至聖隨時應物設教殊途內外相資共利群庶策勸萬行明因果始終推究萬法彰生起本末雖皆聖教而有實有權二教唯權佛乘權實策萬行懲惡勸善同歸于治則三教皆可遵行推萬法窮理盡性至于本源則佛教方為決了然當今學士各執一宗就師佛者仍迷實義故於天地人物不能原之至源余今還依內外教理推窮萬法初從淺至深於習權教者斥滯令通而極其本後依了教顯示展轉生起之義會偏令回而至於末末則天地人物文有四篇名原人也

斥迷執第一習儒者斥偏淺第二習佛者直顯真源第三習了義者會通本末

第四會前所斥同歸一源皆為正義

斥迷執第一習儒道者

儒道二教說人畜等類皆是虛無大道生成養育謂道法自然生於元氣元氣生天地天地生萬物故愚智貴賤貧富苦樂皆稟於天由於時命故死後却歸天地復其虛無然外教宗旨但在乎依身立行不在究竟身之元由所說萬物不論象外雖指大道為本而不備明順逆起滅染淨因緣故習者不知是權執之為了今略舉而詰之所言萬物皆從虛無大道而生者大道即是生死賢愚之本吉凶禍福之基基本既其常存則禍亂凶惡不可除也福慶賢善不可益也何用老莊之教耶又道育虎狼胎桀紂天顏冉禍夷齊何名尊乎又言萬物皆是自然生化非因緣者則一切無因緣處悉應生化謂石應生艸艸應生人人生畜等又應生無前後起無早晚神仙不籍丹藥太平不籍賢良仁義不籍教習老莊周孔

何用立教為軌則乎又言皆從元氣而生成者則歛生之神未曾習慮豈得嬰孩便能愛惡驕恣焉若言歛有自然便能隨念愛惡等者則五德六藝悉能隨念而解何待因緣學習而成又若生是稟氣而歛有死是氣散而歛無則誰為鬼神乎且世有鑑達前生追憶往事則知生前相續非稟氣而歛有又驗鬼神靈知不斷則知死後非氣散而歛無故祭祀求禱典籍有文况死而蘇者說幽途事或死後感動妻子讎報怨恩今古皆有耶外難曰若人死為鬼則古來之鬼填塞巷路合有見者如何不爾答曰人死六道不必皆為鬼鬼死復為人等豈古來積鬼常存耶且天地之氣本無知也人稟無知之氣安得歛起而有知乎艸木亦皆稟氣何不知乎又言貧富貴賤賢愚善惡吉凶禍福皆由天命者則天之賦命奚有貧多富少賤

多貴少乃至禍多福少苟多少之分在天天何不平乎况有無行而貴守行而賤無德而富有德而貧逆吉義凶仁天暴壽乃至有道者喪無道者興既皆由天天乃興不道而喪有道何有福善益謙之賞禍淫害盈之罰焉又既福亂反逆皆由天命則聖人設教責人不責天罪物不罪命是不當也然則詩刺亂政書讚王道禮稱安上樂號移風豈是奉上天之意順造化之心乎是知專此教者未能原人

斥偏淺第一習佛不丁義教者

佛教自淺之深略有五等一人天教二小乘教三乘法相教四大乘破相教上四在篇中五大乘顯性教在第三篇中佛為初心人且說三世業報善惡因果謂造上品十惡死墮地獄中品餓鬼下品畜生故佛

且類世五常之教令持五戒得免三塗生人道中

天竺世教儀式雖殊懲惡勸善無別亦不離仁義等五而有德行可修例如如此國歛手而舉吐蕃散手而垂皆為禮也不殺是仁不盜是義不邪姪是禮不妄語是信不飲噉酒肉神氣清潔益於智也

脩上品十善及施戒等生六欲天修四禪入定生色界無色界天

題中不標天鬼地獄者

界地不同見聞不及凡俗尚不知未況肯窮本故對俗教且標原人今叙佛經理宜具列

故名天教也據此教中業為身本

然業有三種一惡二善三不動報有三時謂現報生報後報

今詰之曰既由造業受五道身未審誰人造業誰人受報若此眼耳手足能造業者初死之人眼耳手足宛然何不見聞造作若言心作何者是心若言肉心肉心有質繫於身內如何速入眼耳辨外是非不知因何收拾且心與眼耳手足俱為質闕豈得內外相通運動應接同造業緣若言但是喜怒哀惡發動身口令造業者喜怒哀等情乍起乍滅自無其體將何為主而作業耶設言不應如此別別推尋都是我此身心能作業此身已死誰受苦樂之報若言死後更有身者豈有今日身心作罪修福令他後生身心受苦樂據此則修福者屈甚造罪者幸甚如何神理如此無道故知但習此教者雖信業緣不達身本

二小乘教者說形骸之色思慮之心從無始來因緣力故念念生滅相續無窮如水涓涓如燈燄燄身心假合似一似常凡愚不覺執之為我寶此我故即起貪貪名利瞋瞋違情境疑疑非理等三毒三毒擊意發動身口造一切業業成難逃故受五道苦樂等身別業感三界勝劣等處所感於所受身還執為我還起貪等造業受報身則生老病死死而復生界則成住壞空空復成

從空劫初成世界者頌曰空界大風起傍廣數無量厚十六洛叉金剛不能壞此名持界風光音金藏雲布及三千界雨如車軸下風遏不聽流深十一洛叉始作金剛界次第金藏雲布雨滿其內先成梵王界乃至夜摩天風鼓清水成須彌七金等滓濁為山地四洲及泥犁鹹海外輪圍方名器界立時經一增減乃至二禪

福盡下生人間初有地餅林藤後粳米不銷大小便利男女形別分田立主求臣佐等種種差別經十九增減兼前總二十增減名為成劫議曰空界劫中是道教指之云虛無之道然道體寂照靈通不是虛無老氏或迷之或權設務絕人欲故指空界為道空界中大風即彼混沌一氣故彼云道生也金藏雲者氣形之始即大極也雨下不流陰氣凝也陰陽相合方能生成矣梵王界乃至須彌者彼之天也滓濁者地也即一生二矣二禪福盡下生即人也即二生三三才備矣地餅已下乃至種種即三生萬物此當三皇已前穴居野處未有火化等但以其時無文字記載故後人傳聞不明展轉錯謬諸家著作種種異說佛教又緣通明三千世界不局太唐故內外教文不全同也住者住劫亦經二十增減壞者壞劫

亦二十增減前十九增減壞有情後一增減壞器界能壞者是火水風等三災空者空劫亦二十增減中空無世界及諸有情也
劫劫生生輪迴不絕無終無始如汲井輪

道教只知今此世界未成時一度空劫云虛無混沌一氣等名爲無始不知空界已前早經千千萬萬徧成住壞空終而復始故知佛教法中小乘淺淺之教已超外典深深之說

都由不了此身本不是我不是我者謂此身本因色心相合爲相今推尋分析色有地水火風之四心有受能領納好惡之想能收行能造作者識能了之四若皆是我即成八我况地大中復有衆多謂二百六十段骨一一各別皮毛筋肉肝心脾腎各不相是諸心所等亦各不同見不是聞喜不是怒展轉乃至八萬塵勞既有此衆多之物不知

定取何者爲我若皆是我我即百千一身之中多主紛亂離此之外復無別法翻覆推我皆不可得便悟此身但是衆緣假和合相元無我人爲誰貪瞋爲誰殺盜施戒知苦遂不滯心於三界有漏善惡斷集但修無我觀智以斷貪等止息諸業證得我空眞如滅乃至得阿羅漢果灰身滅智方斷諸苦據此教中以色心二法及貪瞋癡爲根身器界之本也過去未來更無別法爲本

今詰之曰夫經生累世爲身本者自體須無間斷今五識闕緣不起根境等緣意識有時不行悶絕睡眠滅盡定無想定無想天無色界天無此四大如何持得此身世世不絕是知專此教者亦未原身

三乘法相教者說一切有情無始已來法爾有八種識於中第八阿賴耶識是其根本頓變根身器界種子轉生七識皆能變現

自分所緣都無實法如何變耶謂我法分別熏習力故諸識生時變似我法第六七識無明覆故緣此執為實我實法如患重病心色人夢見可知者患夢力故心似種種外境相現夢時執為實有外物寐來方知唯夢所變我身亦爾唯識所變迷故執有我及諸境由此起惑造業生死無窮廣如悟解此理方知我身唯識所變識為身本不了義如後所破

四大乘破相教者破前大小乘法相之教密顯後真性空寂之理破相之談不唯諸部般若徧在大乘經前之三教依次先後此教隨執即破無定時節

故龍樹立二種般若一不二不共者二乘同聞信解破二乘法執故不共者唯菩薩解密顯佛性故

故天竺戒賢智光二論師各立二時教指此空教或云在唯識法相之前或云在後今意取後

將欲破之先詰之曰所變之境既妄能變之識豈真若言一有一無

者此下却將彼喻破之則夢想與所見物應異異則夢不是物物不是夢寤來

夢滅其物應在又物若非夢應是真物夢若非物以何為相故知

夢時則夢想夢物似能見所見之殊據理則同虛妄都無所有

諸識亦爾以皆假託衆緣無自性故故中觀論云未曾有一法不

從因緣生是故一切法無不是空者又云因緣所生法我說即

是空起信論云一切諸法唯依妄念而有差別若離心念即無

一切境界之相經云凡所有相皆是虛妄離一切相即名諸佛

如大乘藏是知心境皆空方是大乘實理若約此原身元是空空

即是本今復詰此教曰若心境皆無知無者誰又若都無實法依何現諸虛妄且現見世間虛妄物未有不依實法而能起者如無濕性不變之水何有虛妄假相之波若無淨明不變之鏡何有種種虛假之影又前說夢相夢境同虛妄者誠如所言然此虛妄之夢必因睡眠之人今既心境皆空未審依何妄現故知此教但破執情亦未明顯真靈之性故法鼓經云一切空經是有餘說有餘者餘未了也 大品經云空是大乘之初門上之四教展轉相望前淺後深若且習之自知未了名之為淺若執為了即名為偏故就習人云偏淺也

直顯真源第二習佛了義實教者

五乘顯性教者說一切有情皆有本覺真心無始已來常住清

淨昭昭不昧了了常知亦名佛性亦名如來藏從無始際妄想翳之不自覺知但認凡質故耽著結業受生死苦大覺惑之說一切皆空又開示靈覺真心清淨全同諸佛故華嚴經云佛子無一衆生而不具足如來智慧但以妄想執著而不證得若離妄想一切智自然智無礙智即得現前便舉 塵含大千經卷之喻塵况衆生經况佛智次後又云爾時如來普觀法界一切衆生而作是言奇哉奇哉此諸衆生云何具有如來智慧迷惑不見我當教以聖道令其永離妄想自於身中得見如來廣大智慧與佛無異評曰我等多劫未遇真宗不解反自原身但執虛妄之相甘認凡下或者或人今約至教原之方覺本來是佛故須行依佛行心契佛心返本還源斷除凡習損之又損以至無為自

然應用恒沙名之曰佛當知迷悟同一真心大哉妙門原人至此
 然佛說前五教或漸或頓若有中下之機則從淺至深漸漸誘
 接先說初教令離惡住善次說二二二令離染住淨後談四五
 破相顯性會權歸實依實教修乃至成佛若上上根智則從本
 至末謂初便依第五頓指一真心體心體既顯自覺一切皆是
 虛妄本來空寂但以迷故託真而起須以悟真之智斷惡修善
 息妄歸真妄盡真圓是名法身佛

會通本末第四會前所斥同歸一源皆為正義

眞性雖爲身本生起蓋有因由不可無端忽成身相但緣前宗
 未了所以節節斥之今將本末會通乃至儒道亦是初唯第五性教
已去節級方同謂初唯一眞靈性不生不滅不增不減不變不易
諸教各如注記

衆生無始迷睡不自覺之由隱覆故名如來藏依如來藏故有

生滅心相自此方是第四教亦同破此已前生滅諸相所謂不生不滅真心與生滅妄想

和合非一非異名爲阿賴耶識此識有覺不覺二義此下方是第三

說同此依不覺故最初動念名爲業相又不覺此念本無故轉成能

見之識及所見境界相現又不覺此境從自心妄現執爲定有名

爲法執此下方是第二小執此等故遂見自他之殊便成我執執

我相故貪愛順情諸境欲以潤我瞋嫌違情諸境恐相損惱愚癡

之情展轉增長此下方是第一人故殺盜等心神乘此之惡業生地

獄鬼畜等中復有恐此苦者或性善者行施戒等心神乘此善業

運於中陰入母胎中此下方是儒道一真氣受質以氣爲本氣則頓

具四大漸成諸根心則頓具四蘊漸成諸識十月滿足生來名

人即我等今者身心是也故知身心各有其本一二類和合方成一
 人天修羅等大同於此然雖因引業受得此身復由滿業故貴
 賤貧富壽夭病健盛衰苦樂謂前生敬慢為因今感貴賤之果乃
 至仁壽殺天施富慳貧種種別報不可具述是以此身或有無惡
 自禍無善自福不仁而壽不殺而夭等者皆是前生滿業已定故今
 世不同所作自然如然外學者不知前世但據目覩唯執自然
 會彼所說復有前生少者修善老而造惡或少惡老善故今世少小
 富貴而樂老大貧賤而苦或少貧苦老富貴等故外學者唯執否泰
 由於時運皆由天命然所稟之氣展轉推本即混一之元氣也所起
 之心展轉窮源即真一之靈心也究實言之心外的無別法元氣
 亦從心之所變屬前轉識所現之境是阿賴耶相分所攝從初一

念業相分為心境之二心既從細至麤展轉妄計乃至造業如前
 境亦從微至著展轉變起乃至天地叙列

即彼始自太易五重運轉乃至太極太極生兩儀彼說自然大
 道如此說真性其實但是一念能變見分彼云元氣如此說一
 念初動其實但是境界之相

業既成熟即從父母稟受二氣與業識和合成就人身據此則
 心識所變之境乃成二分一分即與心識和合成人一分不與
 心合即是天地山河國邑二才中唯人靈者由與心神合也佛
 說內四大與外四大不同正是此也哀哉寡學異執紛然寄語道
 流欲成佛者必須洞明麤細本末方能棄末歸本返照心源繼
 盡細除靈性顯現無法不達名法報身自然應現無窮名化身

佛

原人論畢

明治三十六年十月二日印刷
明治三十六年十月六日發行

發行者 今村金次郎

東京市芝區露月町十八番地

印刷者 佐久間衡治

東京市京橋區西紺屋町二十六番地

印刷所 株式會社 秀英舍

東京市京橋區西紺屋町二十六番地

發行所 上宮教會



販賣所

東京市芝區露月町十八番地
電話新橋三千二十七番

鴻盟社

